

Headline	Kutip zakat 7 hari, agihannya bagaimana		
MediaTitle	Utusan Malaysia		
Date	12 Jul 2013	Language	Malay
Circulation	197,952	Readership	833,287
Section	Dlm Negeri	Color	Black/white
Page No	10	ArticleSize	356 cm <sup>2</sup>
AdValue	RM 4,639	PR Value	RM 13,916



# Kutip zakat 7 hari, agihannya bagaimana?

Oleh **RAM AL JAFFRI SAAD**

BULAN Ramadan bulan yang sangat rapat kaitannya dengan Rukun Islam ketiga iaitu zakat sehingga bulan ini turut dikenali sebagai bulan zakat.

Seperti biasa, tiba sahaja Ramadan, institusi yang paling sibuk mengurus hal ehwal zakat tentulah institusi-institusi zakat. Sebagai contoh, baru-baru ini Pusat Pungutan Zakat Majlis Agama Islam Wilayah Persekutuan (PPZ-MAIWP) telah mengumumkan bahawa akan beroperasi selama tujuh hari seminggu termasuk cuti umum sepanjang Ramadan pada tahun ini.

Selain PPZ-MAIWP, penulis juga percaya langkah ini menjadi amalan rutin kepada institusi-institusi zakat di negeri-negeri lain juga. Sudah pasti tujuan utamanya adalah memudahkan orang ramai untuk membayar zakat.

Bagaimanapun, usaha ini mengundang perspektif berbeza dalam kalangan masyarakat. Ada yang menganggap bahawa usaha ini amat baik dan wajar dilakukan, manakala ada pihak yang memandang sinis.

Bagi pihak yang menyokong, mereka melihat kepada kejayaan institusi zakat dalam meningkatkan kutipan zakat tahun demi tahun. Sebagai contoh, PPZ-MAIWP berjaya meningkatkan kutipan daripada RM143 juta pada 2006 kepada RM276 juta pada 2010. Bilangan pembayar zakat juga meningkat, iaitu daripada 52,424 pembayar pada 2006 kepada 89,110 pada 2010.

Namun, ada kalangan masyarakat mempertikaikan kenapa kutipan tinggi, tetapi agihan rendah? Institusi zakat mengutip zakat 7 hari seminggu, bagaimana pula dengan agihan zakat? Adakah ia turut dibuat 7 hari seminggu sekurang-kurangnya dalam bulan Ramadan ini?

Persoalan ini mengundang pandangan yang berbeza-beza. Pertama, institusi zakat harus memberi jawapan kenapa kutipan dan agihan zakat tidak seimbang.

Lebih wang zakat berjuta-juta ringgit setiap tahun telah menimbulkan perspektif negatif masyarakat terhadap institusi zakat.

Justeru, punca kepada lebih wang ini wajar diberikan jawapan. Ini penting bagi membuktikan ketelusan institusi dalam pengurusan wang zakat. Jangan biarkan masyarakat mencari-cari jawabannya sehingga menimbulkan banyak pertikaian.

Sebagai contoh berdasarkan pemerhatian penulis terhadap laporan tahunan institusi-institusi zakat, satu daripada punca lebihan adalah kerana peningkatan mendadak kutipan zakat pada akhir tahun. Memandangkan laporan zakat disediakan pada akhir tahun, kutipan yang tinggi tersebut

akan mengatasi jumlah agihan.

Jika dilihat kepada statistik terkini kutipan dan agihan zakat di Selangor, misalnya, sehingga Mei 2013 jumlah kutipan zakat adalah RM146 juta. Namun, jumlah agihan yang dilakukan sehingga Mei 2013 adalah sebanyak RM149 juta.

Ini menunjukkan kurangnya kutipan zakat berbanding agihan sebanyak RM3 juta. Jumlah statistik ini pasti berubah pada akhir tahun nanti, iaitu pada Disember.

Dalam hal ini, penulis percaya jika institusi dapat mengubah tarikh penyediaan laporan kewangan daripada kedudukan kewangan berakhir pada 31 Disember kepada suatu tempoh lain seperti 30 Jun setiap tahun, laporan

kewangan menjadi lebih realistik.

Kedua, agihan zakat wajar ditransformasikan. Proses transformasi ini boleh dipecahkan kepada dua bahagian, iaitu transformasi sumber manusia dan transformasi proses serta bentuk agihan.

Transformasi sumber manusia bermaksud mengoptimumkan kesan pengagihan zakat. Agihan zakat sepatutnya menjadi pemangkin kepada mengubah diri penerima zakat ke satu tahap yang lebih baik daripada sebelumnya.

Perubahan ini merangkumi emosi, rohani dan jasmani. Kesan di sebalik agihan zakat ini penting. Adakah penerima zakat memanfaatkan wang zakat sebaik-baiknya? Adakah agihan zakat menjadikan mereka lebih bersyukur dan menguatkan azam untuk keluar daripada kelompok kemiskinan?

Buat masa sekarang kesan rohani agihan zakat masih boleh ditingkatkan. Mereka harus dididik supaya tidak menyalahgunakan wang zakat.

Amat malang apabila terdapat maklumat bahawa penerima zakat menggunakan wang zakat untuk melakukan perkara-perkara haram seperti berjudi dan maksiat.

Transformasi proses dan bentuk agihan wajar dilaksanakan segera. Kejayaan pengkorporatan sesetengah institusi zakat perlu dilaksanakan di institusi zakat seluruh negara.

Institusi zakat harus diberi kuasa autonomi bukan sahaja dalam aspek kutipan malah perlu meliputi aspek agihan.

Dengan kuasa autonomi ini, barulah institusi dapat menentukan hala tuju dengan lebih jelas. Tidak seperti sekarang yang mana ada institusi zakat hanya bertanggungjawab mengutip zakat tetapi agihan dilakukan oleh pihak lain.

Bentuk-bentuk agihan bersifat sementara seperti bantuan tunai dan makanan wajar ditransformasi kepada sesuatu yang

Headline	Kutip zakat 7 hari, agihannya bagaimana		
MediaTitle	Utusan Malaysia		
Date	12 Jul 2013	Language	Malay
Circulation	197,952	Readership	833,287
Section	Dlm Negeri	Color	Black/white
Page No	10	ArticleSize	356 cm <sup>2</sup>
AdValue	RM 4,639	PR Value	RM 13,916

lebih produktif. Ini bertepatan dengan konsep berubah daripada bantuan berbentuk sara diri kepada bantuan yang menjana pendapatan. Sesuai dengan pepatah Melayu yang mana tidak memberi ikan kepada seseorang sebaliknya memberikan kail untuk mereka menangkap ikan.

Sebagai contoh, model skim Tabung Ekonomi Kumpulan Usaha Niaga (TEKUN) yang dilaksanakan oleh kerajaan boleh dijadikan asas kepada model agihan yang baharu. Kejayaan skim TEKUN ini dalam membantu golongan miskin tidak dapat dinafikan.

Justeru, wang zakat boleh dijadikan dana kepada mana-mana asnaf yang ingin melibatkan diri dalam perniagaan. Dengan dana perniagaan ini mereka akan menjalankan per-

niagaan dan dipantau oleh institusi zakat.

Sebagai kesimpulannya perspektif masyarakat terhadap institusi zakat terutamanya dalam hal kutipan dan agihan boleh dipertingkatkan dari semasa ke semasa. Institusi zakat perlu lebih aktif dalam menjelaskan kepada masyarakat mengenai punca masalah ini berlaku.

Institusi juga perlu meningkatkan cemerlangan pengurusan dengan melaksanakan transformasi agihan zakat. Dengan ini dapat mengurangkan pertikaian masyarakat mengenai bagaimana agihan zakat dilaksanakan.

**PENULIS** ialah Pensyarah Kanan, Pusat Pengajian Perakaunan, Universiti Utara Malaysia